



Hag Cawx Byaek

买菜记

Lij Cibvei(seiq nienzgaep)

Ngoenzneix banhaet, daxmeh hawj gou guhcawj, daengz hawjciengz bae cawx byaek. Haha, gvaqyinx!

Gou naemj ndei cawx gijmaz byaek le, couh buet bae hawbyaek. Gou byaij daengz dangqnaej danbyaek mehsimj seiqcib lai bi he. Caenhraen aen dan de miz makyungz、maenzgat、lauxbaeg、byaekheu……Yienghyiengh cungj miz. Mehsimj riunyumnyum cam gou: “Siuj baengzyoux yaek cawx gijmaz byaek ha?” “O, maenzgat geijlai ngaenz gaen ha?” “Song maenz gaen.” Gou hawj de bang caengh aen he, o, baenz song gaen!

Gou caenh dajsuenq cawx song yiengh

byaek. Seizhaenx gou yawjraen yabuz byoem hau he, aen dan de ngamq miz geij yiengh byaek. Gou naemj, bouxgeq wnggai mbouj yaeh lwnyez ba. Gou caeuq de cawx song gaen byaekheu. Yabuz doq caengh doq naeuz gou: “Bouxwnq gou aeu song maenz haj, yawj mwngz dwg lwnyez, aeu song maenz couh ndaej lo.” Gou hix mbouj siengj gijmaz, riuj byaek couh dauqma. Byaij daengz buenq loh, gou lumjbaenz roxnyinh mizmaz mbouj doiq: Cungj dwg song gaen byaek, vihmaz byaekheu mbaeu baenzlai ne? Baez doiq caengh, caen dwg bw, bouxgeq yaeh lwnyez lo. Yaek bae ra yahgeq gangj leix, siengj yaep he youh mbouj bae lo, suenq dwg baez hit son gvai ba.

Bingzseiz, yawjraen daxmeh cawx byaek banh bae banh dauq, nyinhnaeuz gig genjdanh, siengj mbouj daengz, gig mbouj yungzheih bw.

(Sugij hoiz)

Docih Daxmeh

感谢妈妈

Luj Meijlioz(sam nienzgaep)

Daxmeh, docih mwngz vihliux hawj gou ndaej maj hung maj cangq, ngoenznaengz gwn haemz gwn hoj.

Geiq ndaej miz baez he, gou fat ndat baenz 40 doh, daxboh geij ngoenz haenx dinglingz okcai mbouj youq ranz. Daxmeh gip lumj duzmoed youq ndaw rek ndat nei mbouj rox baenzlawz cij ndei. Byonghhwnz youh ra mbouj ndaej ci, daxmeh caenhndei aemq gou buet bae yihyen. Mbouj rox gvaq le geijlai nanz, gou dingqnyi daxmeh hemq naeuz: “Canghyw, vaiqdi daeuj yawjyawj dahlwg gou.” Gou cij rox daengz yihyen lo. Gvaqlaeng daxmeh youh bang gou aeu yw, youh bwnq gou gwn yw, nyaengq daengz haetcaeux. Banhaet mwh bingh gou haemq ndei le, daxmeh cij ndaej soeng gaemz heiq he.

Daxmeh mboujdanh youq gwnz swngghoz gvensim gou, lij gig gvensim gij hagsib gou dem. Mwh gou bungz daengz giz mbouj rox, daxmeh



cungj naengh daengz henz ndang gou, caeuq gou sijsaeq faensik gij daezmoeg haenx, ra ok haujlai cungj fuengfap bae dap gij daezmoeg haenx.

Vihliux sawj gou sij ndei cozvwnz, daxmeh gingciengz daiq gou bae duzsuhgvanj ciq saw doeg saw, lij ciengzseiz bae bouqsaw cawx saw hawj gou doeg dem, seizneix, gou sij cozvwnz yungzheih lai lo, hix sij ndaej ngoenz beij ngoenz ndei.

Miz daxmeh gvensim, ndaej daxmeh henho, gou baenz baux lwnyez gwnz seiqgyaiq cei qvuenyungz ndeu.

Daxmeh, gou gyaenz mwngz!

(Sugij hoiz)

Dahnuengx gou bineix yienz-naeuz ngamq ndaej 6 bi, hoeng de cix maj ndaej maqhuz sang, bizbwd, lwgda nyaeq cingsaenz dahraix, aenbak de gig cejlej, vunzlai cungj gyaenz de.

Dahnuengx gou mboujdanh coengmingz, lij gig roxsoq.

Ngoenz he daxmeh bae ranzdaiq lo, daengq daxboh daiq dahnuengx, hoeng daxboh banhaemh dauq ranz seiz cungj gwn laeuj fiz liux, ngamq haeuj rug iq couh ninz ndaek lo. Dahnuengx youq ndaw rug hung hix ninz ndaek lo.

Byonghhwnz, dahnuengx ndiu gvaqdaej, yawjyawj mbouj raen bohme youq henz ndang, couh daejnga, nga. De daej ha daej ha, sawqmwh dingqnyi daxboh gyaenz-



Dahnuengx Gou

我的妹妹

Goz Yizgiz(sam nienzgaep)

hwhw, seizhaenx ndaw ranz cungj mbouj hai daeng, dahnuengx couh swnh gij singgyaen gag byaij daengz rug nyaeq bae ra daxboh, de yawjraen daxboh ninz ndaekfofo, hix mbouj heuh daxboh ndiu, couh gag youq henz ndang daxboh ninz ndaek lo.

10 diemj lai cung daxmeh dauqranz lo, youq ndaw rug hung baenzlawz cungj ra mbouj raen dahnuengx, daxmeh haeuj daengz rug iq cij raen dahnuengx cingq caeuq daxboh caenx youq gwnz mbonq gaebgedged haenx ninz. Dahnuengx ndiu le daxmeh cam de: “Vihmaz



mwngz mbouj heuh daxboh ne?” Dahnuengx naeuz: “Gou mbouj siengj nauh daxboh, lau de yietbaeg mbouj gaeuq.” Daxboh daxmeh dingq le cungj riuha.

Dahnuengx gou dwg mbouj dwg youh coengmingz youh roxsoq ha?

(Sugij hoiz)



Bouj Heuj

补牙

Sinj Yoz(haj nienzgaep)

Ngoenzneix, daxboh naeuz daiq gou bae yihyen bouj heuj, hoeng gou baenzlawz cungj mbouj siengj bae. Aenvih gou nyinhnaeuz bouj heuj in lai, gou lau in. “Mbouj ndaej, mwngz itdingh aeu bae, mboujnex heuj baenz non baenzlawz guh?” Daxboh naeuz.

Haeuj ndaw yihyen le, aen sim gou couh diuqbubbub, lumjbaenz miz vunz youq henz rwz lwnh gou: “Bouj heuj in lai, bouj heuj in bw!” Lwnz daengz gou lo, canghyw genjcaz gij heuj gou le, naeuz: “Miz song diuz heujnon lo, aeu bouj cijndaej.” Dingqnyi coenz vah canghyw le, gou saenzdedded dwk naeuz: “Canghyw ha, mwngz gaej yungh rengz nw, gou lau in.” Canghyw riunyumnyum naeuz: “Mbouj lau law, mwngz mbouj luenh doengh couh mbouj in!”

Bouj heuj lo! Canghyw dawzok gij hongdawz geizheih he couh hainduj lo. De aeu aengeng he mbehai aen bak gou, caiq yungh fagngaeu song gyaey youh soem youh goz haenx dok heuj, youh yungh feicuenq cuenq gij heujnon, gaendwk youq bak heuj demh geij gaiq faiq. Gou yawjraen canghyw yaengx hwnj dienhcuenq. Gou lau raixcaix, lienzmuengz cam canghyw: “In mbouj in ha?” Canghyw naihsim dwk naeuz: “Mbouj in! Mbouj in!” De doq gangj doq siudoeg gij heuj gou, ndaw bak gou sawqmwh miz di soem he, yi, dwg guh maz lo? Gou cingq naemj dwk, caenh dingqnyi canghyw naeuz: “Hwnq lo, heuj mwngz bouj ndei lo.” “Bouj gvaq la? Baenz vaiq ha?” Gou cungj ngawz liux. Daxboh riu naeuz: “Ndei lo, ndei lo, dou baema ranz lo.”

A, laxlawz bouj heuj mbouj itdingh in ne!

(Sugij hoiz)